

# Simu

Simu di a sterpa di Pasquale  
E salutemu a so memoria  
E nostre brame sò uguale  
È per mai squaglià la storia  
Fronte feremu à l'imperu  
Cun fede è senz'addisperu.

Simu terra di tradizione  
Cù un populu seculare  
È vulemu incù ragione  
Riacquistà lu nostr'altare  
Fronte feremu à l'imperu  
È à u so vile stafferu.

Simu dinù e risurgenze  
Di un fiume chjamatu Golu  
Chi hà patutu e preputenze  
Di sangue corsu n'hè u scolu  
Fronte feremu à l'imperu  
Per lu so disprezzu altieru.

Simu operai è paisani  
Di una terra cunquistata  
E guerre ci anu fattu danni  
Ch'ella compia francisata  
Fronte feremu à l'imperu  
Di lu paese stranieru.

Simu Corsi è insurpati  
D'un campà di tradizione  
À pattighjà cun scellerati  
Ci hà servutu di lezione  
Fronte feremu à l'imperu  
Chi ci porghju frutt'ascheru

Simu forse spasimante

Sott'a culunizzazione  
Ma s'anu da scioglie e mente  
E rinascerà nazione  
Fronte feremu à l'imperu  
Cu nostru stintu guerrieru  
Fronte feremu à l'imperu  
Fora pristu u furesteru

L.FRANCESCHI / P.BRACCI